



湖廣總敘

北至京師三千里

領府十五直隸州一

湖廣行中書省

國初吳元年二月乙卯立

上以樞密院判楊璟為叅知政事仍命左丞相徐

達率師按視荆湖惟璟與俱 勅諭之曰武昌既

平湖南列郡多陳氏部曲觀望自疑亦有山寨遺

孽憑恃險阻爾當撫輯招徠俾安生業其往欽哉

○按湖廣昔為江漢之地左傳云江漢沮漳楚之

望也湖廣之名雖本于漢之廣矣之語然湖南湖

北在隋唐時已稱之攷沮漳二水自荆岳間始入

江漢水自鄖襄來歷承德漢陽諸郡以入江其流

雖長實不能週楚境而有之惟洞庭湖亘辰常衡
永之區歷長沙寶慶二府至岳州與岷江合逕武
昌而入漢黃則是無一楚地而非洞庭湖水之源
委也廣之為義此實該焉且荆西南沔陽太白諸
湖亦茫茫乎巨浸相望矣湖廣二字非
聖裁烏足以定之臣學佺謹記○今武昌漢陽黃
州三府屬武昌道承天德安二府屬荆西道鄖陽
襄陽二府屬上荆南道荊州岳州二府屬下荆南
道衡州永州二府郴州屬上湖南道長沙寶慶二
府屬下湖南道常德辰州二府靖州屬湖北道

武昌府省下領州一縣九

漢之江夏郡也春秋謂之夏汭昭五年吳伐楚沈
尹射奔命于夏汭是矣漢書高帝六年分南郡置
江夏應劭注云沔水自江別至南郡華容為夏過
郡入江故曰江夏也按江夏郡兩漢俱治安陸自
吳孫策命周瑜為江夏太守始治于此今郡乃江
夏之沙羨縣地後漢獻帝建安末年黃祖為江夏
太守吳王破黃祖于沙羨取其地為都遂改武昌
然是時吳所建都在今之武昌縣非郡治也南齊
志云晉庾翼為江州治夏口宋江夏郡治夏口則

今之郡理耳宋書江夏郡統縣七治江夏而鄂縣自隸武昌則江夏與鄂自是兩處隋唐名鄂州者蓋世本云楚子熊渠封中子紅于鄂然亦今武昌縣也以武昌名郡自唐元和置武昌軍始宋復名鄂州元大德中改武昌路至正末為陳友諒所據俾其子理守之 國初癸卯冬十月

太祖高皇帝親征先是友諒丞相張必先引兵入援次洪山 上命大將常遇春乘其未集擊之遂擒必先又命傅友德陣于高冠山俯瞰城中于是友諒子理出降封為歸德侯湖南州郡聞風款附

吳元年立武昌府隸湖廣中書省與武昌衛同城

江夏縣附郭

釋詳府下自漢至晉皆為沙羨縣地太康元年改為沙陽今縣東南入蒲圻界魚嶽山南沙陽故城是也東晉汝南郡流人寓夏口因僑立汝南郡縣晉末始改江夏又攷隋書平陳之後置鄂州治于此以江夏郡為縣居舊汝南縣界荆湘記云金水北岸有汝南舊城是也開皇十年韋焜于州東南焦度樓下立縣治唐武德初移城南平地即今理按焦度字文績宋明帝時為武陵王叅軍沈攸之

起兵至夏口度力拒之竟不能攻後人因以焦度名樓即今之子城也張舜民南遷錄云鄂州子城與潤州子城金城覆舟山城武昌吳王城制作皆一體依山負險周迴不過二三里乃知古人築城欲堅不欲廣也○汝南城在郡西塗口注水經云塗水逕汝南僑郡故城南晉咸和中避寇南遷因置戶口于塗水側塗水即金水也去縣南九十里源出秦山西注入大江舊傳有金雞從雞翅山南飛產金于此因名金水又名金口其入江夏謂之塗口○夏口城在黃鵠山東北吳孫權所築對岸側入沔津劉宋郢州治此亦名郢城梁武帝起義兵遣曹景宗築曲水城及攻郢城屯兵于上俗名曹公城去縣東北二里○曲水在縣東二里梁邵陵王蕭綸雅好賓客慕王右軍蘭亭流觴曲水之典故以效之○黃鵠山在城西南隅山形蜿蜒俗呼蛇山昔仙人黃子安騎黃鶴憩此有費禕洞在山陰亦傳其為駕黃鶴仙去者梁任昉記以昇仙事乃荀瓌字叔璋非費文禕也志云黃鵠山蛇行而西吸于江其首隆然黃鶴樓枕焉其下為黃鵠磯有石照亭在樓之西臨崖有石如鏡每為西日

所照炯然發光又有十盤亭舊記云東有亭西有
菴十盤而上故以名之〔唐崔顥黃鶴樓詩〕昔人已
乘白雲去此地空餘黃鶴樓黃鶴一去不復返白
雲千載空悠悠晴川歷歷漢陽渡芳草萋萋鸚鵡
洲日暮鄉關何處是烟波江上使人愁輿地碑目
云黃鶴樓記唐永泰中閻伯理撰魏萬成書李陽
冰篆額黃鶴樓詩宋太宗御書刻在州治○漢水
詳漢陽郡下其渡口即漢口也有晴川閣在山上
與武昌郡城正對今府治正當漢陽門內唐李郢
詩雲開遠見漢陽城猶是孤帆一日程○鸚鵡洲

在城南跨城西大江中尾直黃鵠磯即黃祖殺禰
衡處正平嘗作鸚鵡賦後因遇害故以得名塚廟
記云漢禰衡墓在鸚鵡洲畔〔唐李群玉詩〕漢陽抱
青山飛樓映湘渚白雲蔽黃鶴綠樹蔽鸚鵡憑高
送春日流恨傷千古遐想禰衡才令人怨黃祖○
鳳凰山在郡治北吳黃龍初夏口有鳳凰見即此
山也唐岑參詩路指鳳凰山北雲衣沾鸚鵡洲邊
雨○注水經曰江水又東逕歎父山南對歎洲亦
曰歎步矣江之右岸當鸚鵡洲南有江水右迤謂
之驛渚右岸有船官浦歷黃鵠磯而西江水又逕

黃軍浦按黃軍浦在鸚鵡洲下本以三國黃蓋屯兵于上故名沈攸之謂暫泊黃金浦蓋聲之訛也其相連為南浦源出景山西流有趙佗石在其內長十許丈高半之今昔相傳送別之所楚詞云送美人兮南浦唐盧郢詩草生南浦徧離情○洪山在縣東十五里舊名東山茶譜云鄂州東山出茶黑色如韭食之已頭痛唐大觀中建洪山寺于此以隨州大洪山僧靈濟嘗至此因名山巔怪石上鑄有堆雲翠屏獅子峰窪樽數景僧舍分翠軒後石壁上勒洪山賦盈數十尺在榛莽間不可讀又縣南三十里有夜泊山以駱禪師泊舟于此也世傳禪師嘗飛錫八分山有泉出焉大旱不涸八分山者其水分流如八字下注為八分湖建康錄云武昌有山無林正可畚始不可居終山分八字數不及九即此謂也○寰宇記云冶唐山在縣東南二十里舊傳晉宋之時依山置冶因以為名又十里為大觀山其土赤色如金亦名金華山有虎跑泉在其內又十里為江夏山峰巒重疊本名峽山唐天寶間改今名又二十里為黃鶴山其山斷絕岡阜昔有仙人控黃鶴從天而夜響者李太白詩

東望黃鶴山雄雌半空出四面生白雲中峰倚紅
日巖巖既穹跨峰嶂亦冥密頗聞列仙人於此學
飛術一朝向蓬海千載空石室金竈生烟埃玉潭
秘清謐輿地紀勝云黃鶴山起縣東境迤邐至西
北水經注云林巒甚美譙國戴仲若野服居之其
山下曰黃鵠岸有灣曰黃鵠灣○九峰山在縣東
六十里峰巒相次有九故名其上為九峰寺國初
高僧無念所開山也

高皇帝時召入京御製詩送之還山無念卒遣人
賜松花併詩莖于塔下今其地松樹連陰盤結數

十里○縣東南二百里金城山注水經云陸水
經下雋北對金城吳將陸渙所屯按即南遷錄所
云金城險固者也紀勝云陸水即雋水自巴陵入
通城縣界漢書雋水也又肥肉曰雋以此名水者
取其味甘美而長云○輿地碑目云漢陸賈碑在
縣西南陸大憲廟即祀陸大夫者俗傳賈使南粵
至江夏而亡郡人立廟祀之有碑斷裂然于史無
攷或即吳陸抗云○頭陀寺碑晉瑯琊王簡栖文
唐開元六年張廷珪書今亡新碑乃江南徐鍇篆
額韓熙載撰碑陰寺居黃鵠山南皮日休讀書堂

在其內○隋文帝舍利石塔銘在城東十里勝緣寺舊記云隋仁壽年文帝以釋迦如來感應舍利分布天下建塔百所是塔為天下第二○緣果道場磚塔舍利銘亦隋人撰近日居民掘地得之○晉孟宗宅在城南舊為靈竹寺即宗哭竹之所又其傍有丁固宅今為淨脩寺固亦為母思笋泣竹者母嘗作大被以招賢固文學因推重于時云○唐李北海宅在脩靜寺即李邕所居青蓮集有游脩靜寺詩○太白書堂在縣南三十里地名書堂祠堂在其側○李陽冰鄂州篆字在治內相傳篆此字時鬼神泣於空中士大夫爭摹以致遠謂可禦魘魅○蘇子瞻竹鷄堂額元豐己丑二月題近日居民掘地得之右去縣東南五里

武昌縣在府東北一百八十里

秦鄂縣漢武帝封姊為鄂邑長公主于此吳孫權徙都之更名武昌仍與鄂縣並置隋省鄂入武昌○注水經曰江之右岸有鄂縣故城舊樊楚也世本稱熊渠封其中子紅為鄂王晉太康地記以為東鄂矣九州記曰鄂今武昌也孫權以魏黃初元年自公安徙此改曰武昌徙鄂縣于袁山東又以

其年立為江夏郡分建業之民千家以益之至黃龍元年權遷建業以陸遜輔太子鎮武昌孫皓亦都焉皓還東令滕牧守之晉惠帝永平中始置江州傅宗為刺史治此城後太尉庾亮之所鎮也今武昌郡治城南有袁山即樊山也武昌記曰樊口南有大姥廟孫權嘗獵于山下依夕見一姥問權獵何所得曰止得一豹曰何不豎豹尾忽然不見應劭漢官序曰豹尾過後執金吾罷屯解圍天子鹵簿中後屬車施豹尾于道路豹尾之內為省中蓋權事應于此故立廟焉又孫皓亦嘗登之害常侍王蕃推其首使虎爭之北背大江江上有釣臺權常極飲其上曰墮臺醉乃已城西有郊壇權告天即位處顧謂公卿曰魯子敬嘗言此可謂明于事勢矣城東故城言漢將灌嬰所築也江中有節度石三段廣百步高五六丈是西陽武昌界分江于斯石又得東五丈又得沙浦江浦也東逕五磯北有五山泐次江陰故得是名仲雍謂之五圻矣○按九州記鄂王城在武昌縣西南二里楚僭稱王也今人祀鄂王神遺像存焉屬馬蹟鄉○吳王城在縣東一里周四百八十步有五門各以所向

為名惟西角一門謂之臨津北臨大江晉中興書云陶侃領江州刺史鎮武昌課種柳都尉夏施夜盜拔郡西門柳為己所種侃後因駐車施門問此是郡西門柳何以盜種施怖謝罪時人憚之其朱門有夷市亦士行所設土俗編云晉西陽有豫州五水蠻陶侃鎮武昌時作夷市于吳城東以交易是也○吳王城內有安樂宮宮前有御溝水流出為牧馬港即吳王飲馬處宮殿故基今為天王殿相傳南樓即安樂宮端門今之譙樓也晉庾亮鎮武昌佐吏殷浩輩乘秋夜共登南樓俄而亮至將避亮曰諸君少坐老子于此興復不淺便據胡床談咏彌夕唐李白詩清景南樓夜風流在武昌庾公愛秋月乘興坐胡床○宋慶元中修南樓剝土有大石露于外形狀奇崛郡守吳堦見而愛之洗剔出乃磨厓二碑其一刻兩字字曰柳君徑二尺四寸筆勢清勁下若翻書人字或以為符或以為花押邦人至標飾神堂香火供祀其一高丈一尺濶加五寸刻字八十五凡九行其文曰乾貞元年荆襄寇亂大吳將軍出武昌詔太守楊公出鎮後荆江京漢推忠輔國侍衛將軍吳居中記○樊山在

縣西三里出紫石英山之東十步有岡岡下有溪
曰寒溪中有蟠龍石舊傳龍蟠于此石上有廣宴
亭故址即謝朓詩樊山開廣宴者也搜神記云若
大旱以火燒山即能致雨往往有驗世傳孫權嘗
出獵此山見一姥曰我舞陽侯樊噲母也魏將伐
吳當助子一戰後果有赤壁之捷因立廟祀之以
名其山今有樊噲摩旂石按春秋語云鄂渚樊楚
則樊山之名亦不起于三國矣○西山即樊山也
有泉曰菩薩水晉時書滴滴泉三字刻于崖頂有
寺曰西山寺黃魯直題榜蘇子瞻張文潛皆有詩
其序畧云吳王避暑宮在寒溪上今圓通閣是也
宮前銀杏兩株大十圍時鄧聖求為武昌令東坡
居黃與武昌相望嘗往來溪山間後與聖求會宿
玉堂話舊作詩云憶從樊口載春酒步上西山尋
野梅西山一上十五里風駕兩翼飛崔嵬同遊困
卧九曲嶺褰衣直到吳王臺自註云吳王臺在寒
溪有吳王讀書堂堂下有泉世號吳王井○九曲
嶺在樊山南嶺路曲折凡九故名有九曲亭亦名
最樂亭蘇子由記云將適西山行于松柏之間羊
腸九曲而獲少平其下為寒溪雖盛暑涼氣逼人

晉陶侃讀書于此即寒溪寺故基○散花灘在寒溪之側歐陽修集古錄云吳王散花灘疑當時苑囿之別名也怡亭石門窠樽俱在此灘上○怡亭唐裴鷗作宋蔣之奇云怡亭銘刻于江濱巨石上乃唐李陽冰篆李莒八分書裴虬銘世謂之三絕○怡亭西有殊亭唐武昌令馬向作元結記畧曰取其才殊人殊而此亭又殊也○石門者兩石對峙如門亦馬向與元結同遊處石刻尚存○窠樽宋縣令朱蕘書江濱有石其形容唐縣令孟士源命為杯樽以盛酒元結銘曰時俗澆狡日益為薄誰能杯飲共守淳朴○郎山在樊山南一名郎亭山高八十丈周十里樊山之別也土俗編云郎山樊山相接而中斷江上望如八字山下有杯湖孟士源居之元次山序云杯湖東抵杯樽西浸退谷北屈南山南匯郎亭即此退谷在樊山郎亭之間即元結所居五代梁朱友恭徑此鑿山開道射以強弩遂拔武昌○萬松山在樊山北臨江松陰夾路特為幽邃蘇子瞻同弟子由嘗憇于此其詩註云路有直入寒溪不過武昌者山下之捷徑也○樊山下為樊口亦名樊港又曰袁谿控縣湖澤凡

九十九東南匯樊口入江蘇子瞻云樊口有潘生釀酒醇美小舟往來于其間聊以適興耳潘生即潘邠老也○江表傳云晉陶侃卒于樊口百姓思之因立有廟在縣西北一百步龍蟠石側俯臨大江江濱有敗船灣○水經注曰江水右得樊口樊口之北有灣昔孫權裝大舡名曰長安載坐直之士三千人汎之江津欲泝釣臺時風大盛權令當頭取羅州谷利拔刀向柁工曰不取樊口者斬工即轉柁入樊口風益猛不可行其舡至岸而敗故名其處為敗船灣因鑿樊山為路以登名為吳造峴當樊口上一里今厥處尚存○釣臺在縣北大江中孫權嘗駐兵于此晉王敦坐釣臺其子應聞鼓聲有異語敦曰回颿過也使人視之果然○土俗編云江中有大小回在樊口者曰大回在釣臺下者曰小回元次山歌樊水欲東流大江又北來樊山當其南此中為大回叢石橫大江人云是釣臺水石相衝激此中為小回○羅洲一名濯洲亦名蘆洲輿地志云伍子胥叛楚于江上求渡漁父曰灼灼兮侵已私與子期兮蘆之漪子胥既渡解劍與之不受子胥令其勿露漁父遂覆舟而死又

云縣東三里有節度石舊傳子胥去楚漁父接渡于此後訛為節度石石上更有人跡即水經注云西陽武昌分界處○五丈湖在縣東八里舊名南湖湖通江夏經冬則涸無所產植陶侃作堤水常不竭魚菱以蕃美異他產晉末臧質敗走入南湖中以荷葉自蔽即此處也今名羊欄湖○五圻在五丈口之下五洲與解劍亭相對齊安拾遺記以子胥解劍授漁父處舊有亭臨池蘇子瞻詩歸來解劍亭前路蒼崖半入雲濤堆○東坡嘗以伍員渡與劉郎狀為的對舊傳孫權迎蜀主劉備于此

或曰舊名流浪後訛為劉郎在縣東江○蜀秀才王齊萬寓居劉郎洲蘇子瞻贈以詩云傾家取樂不論命散盡黃金如轉燭惟餘舊書一百車方舟載入荆江曲江上書山亦何有五湖遙望劉郎洲○郊天壇在縣西即酈道元稱吳王即位處南郊壇在縣南岡孫權告天地于此其上有二柏樹晉書王敦收郭璞詣南岡斬之璞曰我必死于雙柏下即此○縣東三里有虎頭山以形似而名又名鳳穴山吳黃龍初有鳳凰集其上梁庾信哀江南賦所云龍蟠鳳集者也有鳳凰臺故基即吳大帝

與周瑜魯肅定策建都之所臺下為清思池多蓮
花縣南五里又有蓮花山古老云邑類荷葉此山
若蓮花之浮水○縣西南十里為瓜圻以吳王種
瓜于此縣東七十里有吉祥山亦傳吳王微時隱
所唐羅隱詩吳王當時隱此山吳都去後綠潺潺
○城邑攷云梅城在縣西五十里周一百六十五
步高一丈居半川吳黃武年所城又二十里為仵
城不知所始城中有龍巢兩殿碑○又五里為神
人山高十丈周十里歷代帝王紀云吳建衡年有
神人乘白鹿從此山出其下為白鹿磯廢城塘縣
設此隋末縣令義士暄所置西有水塘故名○黃
石城在縣東二十里仙堂山下此山有仙人修煉
堂基尚存江表傳云劉勳走入樊口及西塞將兵
救皖為孫權所破遂奔曹公即此地○西塞山在
縣東百三十里其地介于兩山之間狀似關塞吳
孫策擊黃祖子射于此故袁宏賦云沿西塞之峻
岿矣舊設有西陵縣晉惠帝時以屬西陽國陳省
入武昌○靈溪山在縣南百二十里高四十丈周
五十里中有寺觀皆以靈溪而名其地有金牛堆
以有金牛數十出堆石上舊為鎮宋嘉定間陞與

武昌縣並隸壽昌軍旋已之又十里為三角山巍然數峰秀插天表狀如三角故名又二十里為虬山山陰有龍穴續搜神記云居人每見神虬飛翔出入旱禱即雨後人築塘其下曰虬塘又五十里為武昌山晉武帝時宣城秦精入此山採茗遇一毛人長丈餘引精至山曲示以叢茗既別復還探懷中橘遺之精怖負茗而歸括地志云山以縣名者武昌其一也

嘉魚縣

在府東南二百八十里

水經注曰江水又逕魚嶽山北下得金梁洲洲東

對淵步洲江濱從洲頭以上皆壁立無岸歷專岐至白沙方有浦上甚難江中有沙陽洲沙陽縣治也縣本江夏郡之沙羨矣晉太康中改曰沙陽縣宋元嘉年割隸巴陵郡江之右岸有雍口亦謂之流口東北流之長洋港歷石子岡岡上有故城卽州陵縣之城也莊平所言左州侯國矣港水東南流注于江謂之洋口南對龍穴洲沙陽洲之下尾也洲裏有駕部宋景平年迎文帝于江陵法駕屯此因以為名有黑龍躍出負帝所乘舟左右失色謂長史王曇首曰乃夏禹所以受天命也我何德

以堪之故有龍穴之名○江水又東左得子練口北通練浦南直練洲練名所以生也江之右岸得蒲磯口即陸口矣水出下雋縣西三山溪東逕陸城北又逕蒲磯山北入大江謂之刀環口東北對蒲圻洲亦曰擎洲又曰南洲洲頭即蒲圻縣治晉太康元年置洲上有白面洲洲南又有滢口水出豫章艾縣東入蒲圻至沙陽西北魚嶽山入江山在大江中揚子洲南孤峙中洲江水左逕烏林南吳黃蓋敗魏武于是處也○畜經云嘉魚縣有魚嶽大崖之山瀕江為赤壁北可望烏林陸口按魚

嶽山在縣西北二里以形似而名魚山水驛設此本晉沙陽縣地隋廢入蒲圻又以其地多產鮎魚因置鮎瀆鎮南唐保泰中始陞為縣○大崖山在縣西南與石頭九隴相峙山頂多巨石外竅中虛古洞深窅懸崖峭削如壁視諸崖為最大下臨淵洲即酈道元所云壁立無岸者也九隴山去今縣南六十里其山九隴四合又二十里為石頭山入蒲圻界○蒲圻縣吳孫權置在蒲圻湖側以其地多生蒲草而名實今嘉魚之境王象之輿地記引唐章懷太子註劉表傳云赤壁山名在今鄂州蒲

圻縣元和郡縣志亦云赤壁在蒲圻縣西百二十里北岸即烏林乃周瑜用黃蓋策焚曹公舡處蓋唐蒲圻臨江之地後圻入嘉魚則在今嘉魚明矣江漢間言赤壁者漢陽江夏接壤但黃州江夏嘉魚凡五處然當縣原與漢陽江夏接壤但黃州差遠耳黃州乃赤鼻山非赤壁也本于蘇子瞻前後二賦蓋當時劉備居樊口進軍逆操遇于赤壁赤壁當在樊口之上又周瑜傳云赤壁初戰操軍不利引次江北則赤壁當在江南亦不應與黃州同在江北也東坡詞云人道周郎赤壁亦屬疑似之辭李白

歌云二龍爭戰決雌雄赤壁樓舡掃地空烈火張天照雲漢周瑜于此破曹公杜牧之絕句折戟沉沙鐵未消自將磨洗認前朝東風不與周郎便銅雀春深鎖二喬○陸口在赤壁之北今名陸溪口孫權使陸遜拒劉備于西陵權屯陸口為衆軍節度處○百足山在縣北五里山勢綿延東西二十里如百足練其下臨江即練子口○白面山在縣南十里世傳有禱此山而生三子皆白面及死為神故名舊蒲圻縣置在白面山前白面洲上輿地紀勝以縣西南三十里龜湖山石色純白有如白

面者然○秦鐘山在縣南三十里世傳秦時于此
鑄鐘其下為太平湖近歲水涸夜有光怪漁者認
其處而掘之得古銅鐘宋秦觀為吊鑄鐘文者○
縣東有岳公湖以宋時岳武穆所駐節有岳公樓
在其上縣東北之揚家涇陸溪口之上流也水經
注云魚嶽山在揚子洲即其地○縣東北四十里
為簪州鎮設有巡簡司其地回複舟行風色不常
俗名杓簪洲簪洲水驛去縣北百五十里

蒲圻縣在府東南三十里

孫吳赤烏九年分武昌為兩部自武昌以下至蒲

圻為右部始置蒲圻縣舊在白面山前今屬嘉魚
境宋初乃移今理○治北有沙陽城基址畧存今
張巡廟是也東北有岳公城宋岳飛征楊公所築
○縣西南八十里有太平城吳孫權遣魯肅征零
陵時築注水經曰陸水又入蒲圻縣北逕呂蒙城
西昔孫權征長沙零桂所鎮即此城也○畜經云
蒲首山在城西三十里蒲圻之首山也縣峙金紫
白石二山多泉湖其南為蒲圻之河合修雋桃溪
二水西北流至陸溪口合于大江○按志白石山
在縣南二十五里山多白石故名其下有顏真卿

祠又五里為金紫山每遇晴霽嵐光輝映如畫邑之美觀也○石泉湯泉在縣東南各三里石泉者泉出石中其味清冷湯泉冬夏常沸炎蒸上達又桃花泉發源南山下泉小而深流合荆泉神山泉發源縣西北四十里之神山湖水環遶泉湧湖中其深莫測○荆港發源荆泉洞去縣南十五里傍列怪石形狀不一中有石田溝墜居人歲視燥濕以占豐凶洞門濶四五尺有泉六左曰荆泉名最著合流數里入于鐘潭又縣西二十里有西泉山多產竹亦名竹山其麓有洞名竹山洞洞口濶五六尺有潭水傍皆石汀沙磧徑曲不窮又近鼓行將二洞俱有石門潭水已上諸泉皆會荆港流入蒲圻河○蒲圻河發源江西寧州之修水合通城縣雋水北流至崇陽會桃溪水折東而西過荆港北逕治南繞其東北復折西北至陸溪口出大江按縣東北三十里有洪口山兩山對峙中貫洪溝雋水所出也○梅湖在縣南錦湖在縣北西梁湖在縣西即蒲圻湖也吳置蒲圻縣于此○縣西三十里有盤石湖又二十里有大羅湖又十里有龍坑湖馬蹄湖滄湖又十里有柳山湖俱流出通新

武昌名勝志 卷之一
店湖○新店湖發源臨湘西入縣界經新店市入嘉魚縣黃岡湖至石頭口會大江○輿地碑目云帝舜廟碑在治之龍翔山西內載二妃文漫滅不可讀○唐竇參宅在定相寺參未第時肄業于此山神告以他日當富貴果如其言因捨宅為寺

咸寧縣

在府東南四百里

本隋江夏縣南境唐大曆二年置永安鎮南唐陞縣宋景德四年避永安陵諱改為咸寧○志云相山在縣治東南半里以宋馮當世嘗讀書其上也○金燈山與相山相接上有善暉禪師塔每月夜

有光如燈至曉乃滅○浮山在縣東南五里卓立塘中若浮故名○潛山在縣南二十里形如展旗晉葛洪修煉于此有潛山碑及李唐侯記又二十里為蘋花溪相傳時有老姥採蘋于溪側人問之曰吾鮑姑也亦洪崖先生浴丹之所○車輞山在縣東四十里山形圓曲如車輞故名○白望山在縣東南六十里巍然獨立望見江夏之白雲湖其山下為蘆花泉昔有白衣男子告邑人禱雨者以縣之高槎泉可致仍指叢蘆為識即此處也再四十里為鐘臺山山上有桃花洞唐李邕讀書石室

尚存頂有石臺又有石鐘或時自鳴○寓仙洞在縣南三十五里洞門高廣其深莫測寒氣襲人有白石如墓滴水結成龍蛇狀○石龜洞在縣境洞門深狹既入輒寬平上有石龍水吐龍口晝夜不絕○大泉小泉俱在縣西南苦竹嶺下鳴水泉飛沙泉俱在縣西南十里其地可雩○沸泉廖家泉俱在縣東十五里○石燕泉沉泉在縣西五十里源出蒲圻入當縣界數里下注石竇中聲如萬鼓伏流不見○西河其源有二一出浚水嶺一出北泉至雙汊合流入梓潭湖在城北十五里為邑境泉流之滙從東北過芥頭湖至金口入大江

崇陽縣

在府南四百里

漢長沙下雋縣地梁陳之雋州唐及南唐之唐年縣也宋改崇陽本于楊吳之名按志唐年廢縣在城東二里桃溪橋之左高崇文孫驤者號愚翁隱于此地今名高家亭○志云大集山在縣北五里自通城龍窖山發源歷方山大石嶺而東至此諸山崇聚故名縣曰崇陽以此治南十里金櫃山形如金櫃乃縣之案山也○壺頭山在治北金城山在縣南各去二十里壺頭者山形如罌壺之口下

有溪穿入山中名桃花洞後漢馬援征五溪蠻至
下雋没于壺頭灘即此地矣○金城山相傳吳陸
渙所治宋黃庭堅讀書其上墨池尚存又三十里
為方山崑頭山四面坦平崑巒幽邃北跨臨湘蒲
圻之境○龍頭山馬鞍山俱以形似而名在縣東
北兩山對峙又十五里為灌溪山唐間禪師所居
有漚麻池劈箭橋諸勝又十里為葛洪山葛洪煉
丹之地上有葛仙壇壇西有泉旱雩多應又二十
里為東泉山山有龍崑龍洞有泉流出入蒲圻界
○龍首崑在縣東十五里石類龍首卧于洞門擊

之聲聞百步北有流泉縈迴三十里可資灌溉又
十五里東平山有禪師崑石屋弘敞內有石如輪
藏過一小洞嵌崑深邃有石床帳幄之屬龍湫所
潛○魯溪崑在龍泉山下去縣西南四十里周迴
二百里其上有洞持燭而入行數十步漸坦平如
居室可容千百衆有石渠泉流清駛名曰魯溪常
時草木狼籍每遇有人入禱則淨若洒掃山前產
茶味極甘美名龍泉茶又二十里為茱萸山重岡
疊阜勢若連雲唐存制禪師居之以多蛇虺毒物
故植此樹○崇頭洪在壺頭山下兩山相夾水中

多石其中為大洪東西為小洪行者不下呂梁之
險縣東有吳城港白石港縣西有白泉河龍坊河
縣南有高視河太原河東北有龍頭河西北有仙
崑河俱會崇陽港以入雋水○輿地碑目云唐茱
萸山存制大師碑銘在崇陽之金界院乾符乙未
歲趙講謨○塚廟記云廖將軍祠在縣西上津渡
唐大中年黃巢之亂廖中兄弟二人糾義兵迎敵
賊斷其首猶躍馬七里與戰宋淳祐間知縣陳仲
微為文以祭之又縣東有温司空祠乃鄂州制置
使温廷筠以禦巢寇有功而授是職邦人德而祀

焉○張乖崖祠在縣北公諱詠字復之嘗為邑宰
有惠政所初有美美亭春谷園其故蹟也縣北小
山上有北峰亭舊名十豐亦忠定公所改又有南
峰亭在南山上古木百株號秀窮林縣令陳仲微
建

通城縣

在府西南
五百里

錫山在縣南七里以其地產錫故名唐天寶間置
錫山市于此元和年更為通城鎮宋熙寧始陞縣
○圖經云縣有幕阜之山其水四出北入雋西入
洞庭東南入于湘按志幕阜山在縣東南五十里

周迴五百餘里昔吳太史慈拒劉表從子磐置營
幕于其上○雋水在縣北半里其味甘美故名從
上雋鄉發源至縣前與秀水合流縣本漢之下雋
地也秀水源出通山之麓以其清潔不污乃稱秀
○縣東十里有東港又縣里有新安港又十里有
鯉港又十里有分水泉縣西十里有黃沙港縣南
三十里有百丈潭又五里有老龍潭其水俱流入
于雋○志云梧桐山在縣西十五里又十里為梅
林山以其山多此二樹故名○白面山在縣西南
十五里山多白石如面相向又十里為鷄籠山夜
靜嘗聞鼓聲○雲溪山在縣南四十里山有溪水
上多雲氣寰宇記係之崇陽蓋未經析置當縣時
也○寶蓋山在城東五十里其下有百丈泉○黃
龍山在東南五十里頂有湫池池有二黃魚能致
雲雨

興國州

在府東南三百八十里

領縣二

宋之興國軍也 國初設府洪武九年改為州以
永興縣省入其始漢江夏郡之鄂縣及下雋兩縣
地西漢志江夏郡下領縣十四有鄂及下雋縣淮
南王傳伍被謂安曰守下雋之城是也吳孫權改

鄂曰武昌分置陽新縣隋改曰富川又改富川為永興初治高陵故城唐貞元初移于長樂鄉之深口宋太平興國間置永興軍于此興國蓋改自永興者亦以年號為名○輿地記云陽新故城在州西南今陽新里沿其名下雒故城去今州四十五里又五里為永興故城其城東臨江水俗傳伍子胥所築○注水經曰江水又東過下雒縣北刊水從東陵西南注之江水東逕琵琶山南山下有琵琶灣也又東逕望夫山南又東得苦菜水水口夏浦也江之右岸富水注之水出新陽縣之青湓山

西北流逕陽新縣南故豫章之屬邑矣地多女鳥玄中記曰新陽男子于水次得之遂與共居生二女悉衣羽而去豫章間養兒不露其衣言是鳥落塵于兒衣中則令兒病亦謂之飛夜遊女矣又西北逕下雒縣王莽更名潤光後併新陽水之左右公私裂溉咸成沃壤舊吳屯所在也○輿地紀勝云十詠堂在軍治紹興間王琪建以前守周紫芝有江南十詠形容風物之美故為堂名○滄浪亭在軍治放生池上池荷彌望遠堤皆揚柳群山環列若屏障然隔池景物殊勝浮菑突兀在雲烟紫

翠間實一郡之奇觀也後因王溉題詠有只應名
在小西湖之句郡人以小西湖名之○疊山書院
在州治東宋寶祐間謝枋得考試建康坐訕謗賈
似道謫居興國軍建書院嵩教授著書宋亡死事
○萬卷堂永興盛子克建內翰毛友題額子克詩
云竹簡牙籤日滿前何妨心醉六經眠○鑑湖亭
在舊南城福勝寺後山之巔三柳堂在淨勝寺之
右面瞰平湖前植三柳故名○景德寺在州治前
有唐人舒元興記尚存○石田驛在治西南蘇子
瞻過此有宿石田驛詩永興李仲覽登進士第未
仕築室瞰湖自號懷坡閣王十朋為賦懷坡二章
○天慶觀在治北天禧九年頒金寶牌于天下福
地以精金為之長一寸九分濶一寸陽文曰玉清
昭應宮成天尊萬壽其背曰永鎮福地此牌尚存
○靈仙觀在治南十里殿閣穹窿廊廡深峻四圍
脩竹森然觀西有別館名曰清虛乃皇甫先生坦
寓遊之所其地有印山在湖中圓正清碧如印浮
水面故名○景星觀在永泰鄉唐貞觀景星見南
方李淳風奏曰永泰之兆福地近在鄂當本縣之
永泰鄉即其地建觀賜名景星乾封二年景星再

見開元二十五年景星又見宋嘉祐年賜額白雲
○鍾成觀在州東南十里鍾成山晉鍾離嘉飛昇
之所○銀山寺在州北十里之銀山四環皆山多
產銀冶故名○桃花寺在州南十五里桃花尖之
下寺中有泉甘美里人用以造茶味勝他處今號
曰桃花絕品宋知軍王琪詩梅雪既掃地桃花露
微紅風從北苑來吹入茶塢中蓋詠此○城東五
十里有大坡山傍有石樓嶄然拔出衆峰里人亦
于此造茶名坡山鳳髓○犀牛山在州北二十里
有石臺砥平如掌相傳有仙姑經此化為犀牛之
蹟又十里為西門山山中有臺亦名仙女臺昔有
三小鬟至此問津望其臺而入竟不復見又二十
里為荆山相傳有人于洞中獲一杖非石非玉非
木非竹忽一日有道人來取遂不見輿地紀勝以
為卞和泣玉之所恐譌○軍山在州南五十里吳
將甘寧墓在焉又十里為城山相傳伍員駐師築
城于此又十里為雞籠山昔有金雞隱伏山巔遇
夜陰晦其光恒出沒于湖山之間○石屋洞在州
南七十里其形如屋高數十丈內有垂石擊之如
鐘尋流可入二里許有石大士像儼然○龍角山

在州西八十里兩峰相對本名龍耳唐天監中改今名又二十里為鳳棲崑地名陽新門高四丈濶二丈二尺內有石寶蓋石龍石鐘卧如來佛禮拜僧及石井○小寶陀山崑穴深半里舊傳趙居士紙衣僧并隱此蔣之竒留題云空傳趙居士不見紙衣僧○九域志云鍾山在州南八十里魏鍾繇學隸書于此有墨池在其內○張衡山在州西南一百里平子隱居于翠屏山有宅在此開鑿之跡儼然又十里為晉孟嘉宅武昌記云嘉有重名為桓温長史墓在州西○嘉子宗監富池魚自結網

捕魚作鮓寄母母曰汝為魚官以鮓寄母非避嫌疑也因卻之○富池源出故永興縣之翠屏六溪至富池口入江去州東六十里州境故多水然皆匯于長河而洩于富池○紀勝云捲雪樓在富池之董龍洲前臨大江張安國書扁又云富池鎮有羅漢院壁間有錢易內翰墨跡及古檜一株大數十圍世傳陳朝所植○甘將軍廟在富池口有墓在廟側繫年錄云建炎四年加封為昭毅武寧靈顯王從劉光世所請也夷堅志云建炎間巨寇馬進自蘄黃度江至廟下求杯珓欲畧興國神不許

至于再三進怒曰得勝玟亦屠城得陽玟亦屠城
得陰玟則并廟藝焉復手自擲之一墮地一不見
俄俯著于門頰上去地數尺屹立不墜進驚懼拜
謝而去迄今龕護于故處過者必瞻禮殿內高壁
上亦有二大玟虛綴楣間相傳以為黃巢所擲也
○宋汪彥章次興國詩路入麇麇亭子嶺江圍蒲
稗富川城北風捲地來無際西日御山未肯青絕
浦踈梅和雪點長天數鴈背人橫侵尋短髮愁中
老行盡江南春復生○郡守周紫芝云富池湖中
歲取荷葉可賀百千一日曝之湖濱大風吹捲

數十里俱盡遂賦詩云湖邊老守湖是家湖光十
里皆荷花我來不見花如錦但聞荷葉飛天涯

大冶縣 在州西北
百五十里

唐置大冶青山場南唐陞為縣宋以屬興國軍○
志云鍊山在縣北二十里舊置爐燒煉金鍊于此
其下有宋武帝劉裕祠又二十里為白雉山其上
有芙蓉峰獅子嶺金雞石諸勝晉宋以來俱置有
銅場鑄監今山口墩俗謂之銅窰其遺跡也又縣
治西南銅綠山亦古出銅冶鑄之所按縣名大冶
本此○晉經云大冶望山為西塞其右有三洞上

雲下風中泉傍有琦玗按西塞山在縣東九十里
高一百六十尺周三十七里延連江側東望偏高
謂之西塞昔為吳楚境孫策襲黃祖劉毅攻桓玄
皆破之于此今名為道士袂即唐之士袂鎮也貞
元間符戴有土袂鎮保寧記今設巡司口回山在
西塞山之右上有三洞即晉經所云出雲風泉者
唐元結讀書于此天寶間忽有泉湧出垂流四百
仞名曰異泉次山因作異泉銘口散花洲在西塞
山下江夏辯疑云昔周瑜敗曹兵于赤壁吳主于
此散花勞軍故名口琦玗洞在西塞山之側又名
飛雲洞元結自號琦玗子本此文獻通考有琦玗
子一卷元次山撰○志云東方山在縣北二十里
相傳漢東方生舊隱之所唐智印禪師居之有卓
錫泉白蓮湧出又縣西南二十五里有蓮花山亦
云東方朔遊玩處三十里有書堂山世傳為東方
生讀書堂其中有靈子寺去山六七里有妙子洞
謂曼倩二子長靈次妙者所居攷輿地記東方山
與武昌縣連界以其在武昌之東而名好事者目
為東方朔且併其二子而附會之殊無謂○縣中
亦多許旌陽遺跡如馬隘山五卦山章山牯牛洲


皆是按馬隘者以旌陽逐蛟至此衆以牛馬隘之故名去縣北二十里自馬隘延連至道士袂皆名章山石上有許真君試劍痕又三十里為五卦山相傳旌陽將與蛟鬪預卜五卦于此○礓山在縣東四十里磁湖山側昔蘇子由阻風于此有寄子瞻詩仍欲買山隱焉磁湖者以岸傍多生磁石故名宋紹興間新生一洲相望磁湖狀如覆釜浸長與黃石峙立○塚廟記云漢荆王賈墓在縣西北六十里世傳九江王黥布反賈率兵討之戰歿塋此

通山縣

在州西一百八十里

寰宇記云本唐永豐縣之新豐鄉揚吳武義中以隸羊山鎮後周顯德六年南唐建為縣○志云白羊山在縣西二十里東晉永昌中有三人乘白羊入此山故名至今每有白羊見于山上則雲雨興宋蔣之奇詩我愛通羊好青山便是城白雲深處宿一枕玉泉聲李傳正詩我愛通羊好居民山作城眼前無俗事枕畔有灘聲○輿地紀勝云宿雲亭在縣後山取蔣穎叔白雲深處宿之句也此外有翠屏亭塵外亭俱在縣西南翠屏山上有石塔

東西二泉人居環繞如城亦名石城其下有李煜墓石人獸俱存○石航山在縣東石梯山在縣南各去二里許俱以形似而名縣東五里又有石牛潭潭上有石大如牛漢東大洪馬坪諸水至此會為溲水者也○會仙崑在縣南二十五里高五丈深七尺懸石若鐘鼓扣之有聲巨石如床昔樵者見其拄錫端坐其上頃即不見疑以為仙人云○縣西南二十五里有觀音崑宋紹興間居民萬峻見雲氣盤結異常尋源獲一洞深窈廣十丈餘有石磬石盤石果及大士像其傍人物森列縣令朱朝仙為之記○大賢洞在縣西南三十里介于泉臺翠屏之間昔王張二真人結隱于此○大城山在縣南六十里高峻有石門可登凡四相傳張平子好機巧造鍊舡出至永興迷潭而舡沒今其傍有平子祠○沉水山在縣東六十里崑谷深邃人跡罕及中有仙人壇石鐘鼓羅列左右舊志云唐李靖遇龍行雨入此崑間○九宮山在縣東南八十里其山自下而上峰巒九層故名有九真觀相傳晉安王兄弟九人避難于此造九宮殿其遺址云有噴雪崑在山西南水口



卷之二